

**ILUARSIISSUT****Isumaliutissiissut 9. novemberimeersumut iluarsiiisut**

**Uunga siunnersuut: Inissianik attartortitsisarneq pillugu Inatsisartut peqqussutaani nr. 2-mi, 12. maj 2005-imeersumi ilanngussaq 4 (Ileqqorissaarnissamut malittarisassat) allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasillunga tunngaviusumik pisortat inissiaataanni qimmeqarnissaq aamma/imaluunniit qitsuuteqarnissaq akuerineqarsinnaalersillugu. (Inatsisartuni ilaasortaq Randi Vestergaard Evaldsen, Demokraterne)**

**pillugu****Sanaartornermut Ataatsimiititaliap****siunnersuutip aappassaaneerpeqarneranut****ISUMALIUTISSIISSUTAA**

Sanaartornermut Ataatsimiititaliap suliarinninnermini ilaasortarai:  
Inatsisartunut ilaasortaq Anders Olsen, Siumut, Siulittaasoq  
Inatsisartunut ilaasortaq Peter Olsen, IA, Siulittaasup tullia  
Inatsisartunut ilaasortaq Bentiaraq Ottosen, Atassut  
Inatsisartunut ilaasortaq Justus Hansen, Demokraatit  
Inatsisartunut ilaasortaq Pele Broberg, Partii Naleraq

Sanaartornermut Ataatsimiititaliap ulloq 25. oktober siunnersuut siullermeerinninnerup kingorna misissorpaa

**Siunnersuutip imarisai siunertaalu**

Qimmeqarnissamut qitsuuteqarnissamulluunniit akuerineqarnissaq ilanngussaq 4 –mi Ileqqorissaarnissamut malittarisassanik allannguinnikkut aallaaviussasoq, siunnersuuteqartup kissaatigaa.

**1. Siunnersuutip Inatsisartuni siullermeerneqarnera**

Siunnersuut taparserneqarluarpoq, Naalakkersuisulli isumakulunnartoqartippaat siunnersuutip kinguneqarnerlussinnaanerani taamaattumillu allannguutissatut siunnersuuteqarput imaattumik:

” Suleqatigiissitaq pilersinneqartoq inissiani attartortittakkani uumasuteqarsinnaanermut isummernissaanut aammalu suleqatigiissitaq attartortitsisarneq pillugu inatsimmi nutaami tamanna pillugu imassaanut inassuteqassasoq Naalakkersuisut”.

Sanaartornermut Ataatsimiititaliamit pissutsit qanimut misissorneqarnissaat tamanit taparserneqarpoq.

### **Tusarniaaneri**

#### INI A/S

Ulloq 2. november INI A/S-imit ataatsimeeqateqarnermi paasissutissiivoq qimmeqarnermut qitsuuteqarnerlu immikkut isummerfigisimanagu. Suliffeqarfiup pingaarnertut siunertaraa, inatsisit inissiamillu piginnittup kissatai malillugit allaffissornikkut aqutsinissaq.

Inissiaatileqatigiiffimmi immikkoortortanut attartortunulluunniit allanut aningaasartuutaassanersoq massakkut suli naatsorsuisoqanngitsoq ilisimatitsissutigineqarpoq. Naammagittaalliortoqalernissaanulli patsisissaqartoqalerpat allaffissornikkut aningaasartuutit amerlinissaat naatsorsuutigineqassasoq nalilerneqarpoq.

Qitsuuteqarnissamut qimmeqarnissamullu akuersissutit kissaatigineqartut tunuarsimaarfiginiarneqartarsimapput kisianni politikkikkut allannguuteqarnermi kissaatit naapertorlugit allaffissornikkut aaqquissuussisoqarusussinnaasarpoq.

#### ISERIT A/S

Ataatsimiititaliap ilisimasimammaagu kommunip inissiaatileqatigiiffia pineqartumi misilittagaqartuusoq ISERIT A/S attavigineqarpoq.

Ajoraluartumik inissiaatileqatigiiffik naapinneqarsinnaasimanngilaq taamaallaalli isummersuutini ataatsimiititaliamut nassiuppai:

”Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersumi § 50-imi imm. 3-5 inissiani kommunimit namminersorlutillu oqartussanit pigineqartuni uumasuteqartarneq pillugu pingaarnertut aalajangersarneqarsimapput.

Siusinnerusukkat attartortitsisup uumasuteqarnissamut qinnuteqartunut akuersissanerluni aalajangiissalluni, pissutsillu imaassimapput (kommuni sinnerlugu) ilaqutariinnut arlalinnut inissianut qimmineqarnissamut qinnuteqaat itigartittarlugu. Akerlinganilli ilaqutariinnut arlalinni inissianut ilaqutariinnullu

illunut affarleriinnut qimmeqarnissamut akuersinermigut qinnuteqartunut periarfissiisarpoq.

Immikkoortorta qarfinni najugallit qanoq periarfissinneqassasut qitsuuteqassanersut qimmeqassanersulluunniit immikkoortorta qarfinni ataatsiakkaani siulersuisut aalajangiinissamut piginnaatinneqassasut januaarimi 2017 kommunalbestyrelsip aalajaangerpaa.

Tamanna malillugu attartortunut uumasuuteqarnissamik kissaateqartunut periusissaq imaalissaaq – uumasuuteqarnissamut akuerineqartumik attartortoq inissiami najugaqarsimappat – attartortoq uumasuuteqarnissamut akuerissummik pigisalik Iserit A/S –imut uppersaammik tunniussaartussamut saaffiginnissaaq. Taava attartortoq uppersaamat uumasorlu nassarlugit kommunimut saaffiginnissapput, innuttaasunut saaffiginnittarfinni uumasooq nalilersorneqassaaq, akiuussutissanik kapitinnissamut malittarisassat malinneqarnersut, kinguaassiorsinnaatitaanerit / issuigaanersoq/mannisaagaanersoq, piginninnermut tunngasut, sillimmasiineq il.il. pissusissamisoornersut. Taava kommunip attartortup pineqartumik uumasuuteqarsinnaaneranut akuersissut tunniutissavaa, kiisalu aaqquissuussinermi najukkamut allattorsimaffimmut ilanngullugu.

Taava akuersissut kommunimut Iserit A/S-imi suliareqqitassanngorlugu nassarneqassaaq, attartortoq uumasuuteqarnermut qularnaveeqqutinut akiliisinneqassammat, takuuk, Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq §50, imm. 3, 4 aamma 5 naapertorlugu. Uumasuuteqarnermut qularnaveeqqut akilerneqareerpat, Iserit A/S-ip naggataarutaasumik uppersaammik tunissavaa ”uumasuuteqarsinnaanerimut akuersissut uppersaat.”

### **Inatsisit atuuttut**

Pineqartumi inatsit atuuppoq, Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq §50, stk. 3:

” *Imm. 3.* Namminersornerullutik Oqartussat kommunellu inissiaataanni attartortittakkani attartortitsisoq allakkatigut akuersissuteqarsimatinnagu inissiami uumasuuteqartoqaqqusaanngilaq. Taamaattorli aalisakkat aalisagaasivimmiittut, timmisat ineqartinneqartut, kikkaasut ineqartinneqartut, kiisalu saaniluit akuersissuteqarnissamut piumasaaqarfiussanngillat. Uumasuuteqarnissamut akuersissuteqarnermi attartortitsisup qaammatini pingasuni ineqarnermut akiliutip annertoqataanik immikkut sillimanissamut akiliuteqarnissaaq piumasarisinnaavaa. Attartortut peqqussutip matuma atuutilernissaata tungaanut maleruagassat malillugit uumasuuteqarsimasut, uumasuutigisap maleruagassat malillugit uummasuutigineqartup pigisaqaannarnissamut pisinnaatitaapput.  
*Imm. 4.* Attartortup akuersissutip tunniunneqarneranut atatillugu sillimmasiinissamut akiliutissaaq aningaasanngorlugu akilissavaa.  
*Imm. 5.* Attartukkap qimanneranut atatillugu uumasuuteqarnerup

kingunerisaanik ajoquserneqartut iluarsaannerinut attartortitsisup sillimmasiissutit atorsinnaavai.”

Ileqqorissaarnissamut malittarisassat:

” Attartortitsisoq allakkatigut akuersiteqqaarnagu qimmeqartoqaqqusaananilu qitsuuteqartoqaqqusaanngilaq. Allamik peqqutissaqavitsinnagu ilaqutariinnut arlalinnut inissiani, tassalu illuni uiguleriinni inissiarsuarnilu qimmiuteqartoqaqqusaananilu qitsuuteqartoqaqqusaanngilaq. Qimmeqarnissamut qitsuuteqarnissamulluunniit immikkut ittumik qularnaveeqqusiisoqarnissaa attartortitsisup piumasarisinnaavaa.”

Oqaaseqaatini aalajangersakkani ataasiakkaani ilanngunneqassaaq –mut tunngasoq § 50, -mut tunngasoq Stk. 3:

” Aallaaviatigut Namminersornerullutik Oqartussat kommunellu inissiaataanni attartortittakkani qimmeqarnissaq qitsuuteqarnissarlu inerteqqutaavoq. Attartortoq peqqussutip matuma atuutilernerani maleruagassanik unioqqutitsinani inissiami attartortittakkani qimmeqartoq qitsuuteqartorluunniit uumasuutit toqunissaata tungaanut imaluunniit attartortup arlaannik peqquteqarluni uumasuutaarunnissaata tungaanut qimmeqarsinnaavoq qitsuuteqarsinnaallunilu.

Taamaattorli ilaqutariinnut ataatsinut illuni illunilu affarleriinni attartortup attartortitsisumut allakkatigut qimmiuteqarnissaq qitsuuteqarnissarlu qinnutigisinnaavaa. Qimmeqarnissamut qitsuuteqarnissamulluunniit akuersissuteqarnermi attartortitsisup qaammagini pingasuni ineqarnermut akiliutit annertoqataanik immikkut sillimanissamut akiliuteqarnissaq piumasarisinnaavaa. Uumasuutit toqunerani imaluunniit attartortoq arlaannik peqquteqarluni uumasuuteqarunnaarpat, attartortitsisoq illuut attartugarlu takuniarlugit attartortup sillimmasiissutaanik tigumminiinnarnissamut piumasaqaatit atuukkunnaarsimansut, aammalu aningaasat utertinneqassanersut aalajangersinnaavoq.”

Inatsimmut ilanngunneqassaaq oqaaseqaatit nalinginnaasut, ileqqorissaarnissamik malittarisassani immikkut:

” Nuup Kommuneaniit illuni sanileriinni uigulukuttunilu namminerisamik isertarfilinni uumasuuteqartoqarsinnaannginneranik sukannernerulersitsineq naapertuussorineqanngilaq, taamaattumillu kommunemiit tamatuma qasukkartinneqarnissaa taamaalillunilu attartortut toqqissisimanerisa ajorserianninnissaa inassutigineqarpoq. Naalakkersuisut pisortat inissiaataanni attartortittakkani qimmeqarnermut qitsuuteqarnermullu maleruagassat aalajangiusimaannarpaat. Tamatumunnga peqqutaavoq uumasuutit inissiami annertuumik nungullartitsisarmata, tamatumalu saniatigut sanilinut akornutaasinnaallutik.”

Aallaaviatigut inissiani uumasuuteqaaqusaassanngilaq, taamaallaat uumasut allattorsimaffimiittut kisiisa pinnagit, qimmiugaluarpas qitsuugaluarpaluunniit eqikkarlugu

taama isumaqarpoq. Pissutsit immikkut ittut atuuppata taamaallaat uumasuuteqartoqarsinnaavoq.

Aammali attartortitsisumit akuerineqaqqaassalluni. Imaappoq, kisimi ilumut pissutsit taamaattut atuutissanersut attartortitsisup nalilertussaavaa. Qimmimik piginnittoq ilaqutariinnut ataatsinut illumi imaluunniit affarleriimmi illumi nammineq isertarfilimmi najugaqarsimappat, isummanik naliliinermi aallaaviusoq avaqqunneqarsinnaavoq. Qimmit isertarfinni qiluttut akisuasinnaanerilu kissaatigineqanngimmata, tamassumunnga tunuliaqutaasoq naatsorsuutigineqarpoq.

Taama sukangasuumik malitassaqaarneq ima tunngavilersorneqarpoq, uumasut annertuumik naleqqutinngitsumillu inissianut nungullartitsisarneri aammalu affarlerisamut akornutaasinnaammata. Nungullartitsisarnermut ajornartorsiut pinngitsoortinneqassappat, immikkut ittumik qularnaveeqqusiinermik qaammatinut pingasunut inimut akiliisitsiniartoqarsinnaavoq.

### **Siunnersuutip aningaasatigut kingunerisassai**

Inatsisartut suleriaasissiani § 33, imm. 1-imi erserpoq, siunnersuutip aalajangiunneqartup piviusunngortinneqarnerani aningaasaqarnikkut allaffissornikkullu kingunissai siunnersuutip pilersinneqarneranut pissutaasunut allaaserineqassasut.

Siunnersuutip aningaasaqarnikkut kingunissai matumuuna siunnersuutip piviusunngortinneqarnerani imaapput, ilanngusssaq 4 attartornermut peqqussummi maannamut atuuttumut taamaallaat allannguutaassasoq, Ataatsimiititaliap paasivaa.

Taannalu imatorsuaq akisussanngitsoq naatsorsuutigineqarpoq.

### **Ataatsimiititaliap siunnersuummik suliarinninnera**

Qimmeqarsinnaanermut qitsuuteqarsinnaanermut ileqqorissaarnissamullu malittarisassat pillugit apeqqutit pisortat inissiaatileqatigiiffiitut angisuunut marluusunut Ataatsimiititaliap saqqummiuppai.

Attartortunut atugassarititaasut qanoq ingerlanneqarnissaannik najukkami najugaqartut oqartussaaqataanerat aalajangiisuussasoq, ISERImi toqqarneqarsimasoq periuserineqareersoq, ataatsimiititaliamit pitsaasutut isigineqarpoq.

ISERImi periuseq toqqarneqarsimasoq imaaliiallaannaq ima paasineqarsinnaavoq uumasuutillit ilaat kommunitumut uumasuutitik takutinnginnerini ilumoortumik uumasumut piginittutut inissisimareertartut, Ataatsimiititaliap oqaaseqaateqarnerminut tunngaviliivoq. Tassunga tunngasumik aaqqiagiinngissuteqarsinnaanerit takuneqarsinnaapput.

Akuersisummik tunniussaqaarsinnaanginnermi taamungaannaq naliliinikkut pissasoq, Ataatsimiititaliap maluginiarpaa. Qimmip, piginnittup najukkamilu pissutsit qanoq ittueneri naliliinissamut atorneqassapput. Qimmip qanoq qaasutsiginera, eqqissiveqannginnera, paarinerlugaanera, ilaqtariinnut arlalinnut inissiaanersoq, matoqqasumik tummeralimmiinnersoq, inissiap qanoq pitsaatiginera allallu pissutsit assingusut atuuttut, taassuma ataaniipput.

Sanaartornermut ataatsimiititaliaq qulaani allassimasoq pillugu allannguutissamik siunnersuuteqarpoq.

### **Ataatsimiititaliap inassuteqaatai**

#### **Allannguutissatut siunnersuut una akuerineqassasoq Sanaartornermut Ataatsimiititaliap isumaqatigiittup inassutigaa.**

”Inatsisartuni aalajangigassatut siunnersuut, UKA2019-imut inatsissamik siunnersuuteqarnissamik Naalakkersuisut piумаффигинеqassasut, Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq § 50, imm. 3-5-llu allanngortinneqarnissaat pillugu tassunga ilaasoq ilanngussaq 4 (ileqqorissaarnissamik malittarisassat) imaalillugu, aallaaviatigut pisortat inissiaataanni uumasuuteqarnissaq akuerisaassasoq, pissutsit immikkut allat atuutinngippata.


Namminersorlutik Oqartussat inissiaatileqatigiiffii assingusumik nalunaarfigineqassasut, maannakkuugallartumut periuseqarneq uumasuuteqarnermut akuersaartuussasoq, inissiami pineqartumi pissutsit aallamik tikkuussinngippata.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




---

Bentiarq Ottosen




---

Anders Olsen, Siulittaasoq




---

Peter Olsen, siulittaasup  
tullia



---

Justus Hansen



---

Pele Broberg